

author: Bonzanini, Giacomo
title: El togn fachin : commedia originale in quattro atti
shelfmark: COLL.IT.0008/0001/05
library: Biblioteca nazionale Braidense - Milano - IT-MI0185
identifier: MIL0653698

Le riproduzioni digitali accessibili dalla Biblioteca digitale italiana di www.internetculturale.it sono per la maggior parte di dominio pubblico, e provengono dalle attività di digitalizzazione realizzate dalle biblioteche che possiedono gli originali e la proprietà delle riproduzioni digitali, e sono istituzioni partner del portale.

La riutilizzazione non commerciale è libera e gratuita nel rispetto della normativa vigente.

Ai fini della riutilizzazione commerciale e/o per ottenere un documento ad alta definizione contattare il detentore dei diritti del bene digitale utilizzando nel Download del documento, il contatto di posta elettronica.

Gli utilizzatori finali dei beni digitali, sia che riproducano parzialmente o completamente le immagini, dovranno sempre e comunque citare la fonte www.internetculturale.it

.....

The digital reproductions accessible from the Italian Digital Library www.internetculturale.it are mostly of public domain, and come from the digitization activities carried out by the libraries that own the originals and are ownership of digital reproductions, and are Institutions partner of the portal.

The non-commercial re-use is free in accordance with the local regulations.

To allow commercial reuse and/or to obtain a high-definition document please, contact the copyright holder of the digital object using the contact e-mail you can find in the Download of the document.

The terms of use of the Internet Culturale material states that the final users that reproduce images or part of them must mention the source www.internetculturale.it

Alla Biblioteca di Vera Pevore

V.



REPERTORIO
DEL
TEATRO MILANESE

EL
TOGN FACHIN

COMMEDIA IN QUATTRO ATTI
DI GIACOMO BONZANINI

MILANO
CARLO BARBINI EDITORE
Via Chiaravalle, 9.

Fasc. 5.

9

REPERTORIO DEL TEATRO MILANESE

PATTI D'ASSOCIAZIONE.

In questo Repertorio verranno pubblicate tutte le migliori produzioni del Teatro Milanese.

Ogni quindici giorni uscirà un fascicolo contenente una Commedia o due Farse.

Per chi si associa ai primi VENTI fascicoli, il prezzo da pagarsi anticipatamente sarà di lire 5.

Un fascicolo separato Cent. 35.

Le Associazioni si ricevono esclusivamente presso Carlo Barbini, in Milano, via Chiaravalle 9.

DI PROSSIMA PUBBLICAZIONE:

*Quarantott or, farsa del signor Camillo Cima.
I feugh artificiaj, farsa del sig. Giovanni Duroni.*

REPERTORIO DEL TEATRO MILANESE

Fascicolo 5.

5

EL

TOGN FACHIN

COMMEDIA ORIGINALE

IN QUATTRO ATTI

n.

DI GIACOMO BONZANINI

Rappresentata la prima volta in Milano il 5 agosto, e la seconda volta
l'8 settembre 1869 a Varese dai Filodrammatici dell'Accademia
del Teatro Milanese.



CARLO BARBINI EDITORE

Chianale, 7

1869

✓

ur

Questa produzione è posta, per quanto riguarda la stampa, sotto la salvaguardia della legge 25 giugno 1865, N. 2337, qual proprietà dell'Editore **Carlo Barbini**.

La rappresentazione di questa produzione è sottoposta al disposto dell'art. 10 della Legge 25 giugno 1865 N. 2337 ed all'art. 22 del relativo Regolamento 13 febbrajo 1867.



Tipografia Golio, Via Pietro Vetri, 18

EL TOGN FACHIN

PERSONAGGI

Togn Bustella, fachin, mari de
Luisa.
Gaitan, calzolar
Peder, fruttirœu
Savina, madamin } sò fioeu.
Ignazi, bagaj de 12 ann }
Teresa, lavandera, vesinna de la porta.
Batista, refitù de cà.
Ernest Cresti, impiegaa, inquilin.
Angiolina, sopressadora, inquilinna, morosa de
Gaitan.
Ninetta, piscinina de la sopressadora.

La scena è in Milano.

ATTO PRIMO

Stanza ad uso cucina con camino, tavolo, sedie, credenza,
rame, tondi, il tutto in istato miserabilissimo. —
Letto grande in un angolo su due cavalletti. — Un
panchetto da calzolaio con tutto l'occorrente.

SCENA PRIMA.

Luisa che sta vestendo **Ignazi**,
Peder, seduto sul letto.

LUI. Te see bon de sta quiett on moment, si,
o no?
IGN. Cosse foo, infin?
LUI. Te stee mai savi, e poss minga fa prest
a vestit... L'è ona gran vergogna, a vedè
on fioeu de nœuf ann, vecc comè on asen,
l'è minga nancamò bon de vestiss de per
lù. Va là, va là, seguita pur a fà insci,
che te feniree a vegnì su come quell bell
mobil là... sì, sì...
IGN. Dove l'è sto bell mobil?
LUI. Là, là... quella bonna lana là. (*indicando
Peder*)
IGN. Chi, el Peder?
PED. Cossa gh'è? S'hii semper sotta vialter?
Sangue de bio, se pò mai sta quiett on
moment.
LUI. Se te comoda minga a senti frecass, te
see come va faa.

PED. Già, già (*cantichiando*): « Omi, omi, omi, o che mal de stomi. »

LUI. Cià donca, ti Ignazi, fa prest, mangia a la svelta ch'hin già vott e mezza, e se te s'intardiet, te set el maester che ciocch el mett giò.

IGN. La batt d'avegh el pens...

LUI. Che pens che pensa; mi me pias che te faghet i robb polid, senza el bisogn de dovè ricor a quij misur li. La lezion te la see?

IGN. Ouh...

LUI. Cià el liber che te la prœuvi...

IGN. (*eseguisce*) Tœù... a metaa de la pagina vintisett, dove el dis: « Cacciato dalle armi straniere... »

LUI. Va ben, va innanz...

IGN. « Si ricovera in Egitto alla corte dei Tolomei... »

LUI. Sì, sì, te la see. Adess fa colazione, e guarda de no sporcass; dopo feniss quj somm li... (*a Peder*) Dimm on poo ti lizon, te fee cunt de sta li insci tutta la giornada buttaa giò sul lett comè on porscell?

PED. Cossa ghe n'importa a lee? Finna che stoo chi nè mangi, nè strasci i pagn, nè foo del mal.

LUI. Ma t'en guadagnet minga. Vergogna, on gioven de vintiduu ann, buttaa giò tutt el dì a fa nagotta, o andà del racanatt a in-grapass cont quij bej mobil li del Streccion.

PED. Hin tutt fior de bulli, la sa? El Tanella, el Bisc, gh'han cœur per difend on amis de fass sbusà lor la pell del venter.

LUI. Bei abilitaa ch'in quij li. En guadagnen almen?

PED. Press'a pocch compagn de mi.

LUI. Sì, sì, hoo bell e vist, s'i de mett tutt insemma. Ma, dimm on poo, come te fà a vegni minga la vita in odi? Te ghe minga scrupol a fatt mantegni de to fradell e toa sorella eh?

PED. Che fradell, che...

LUI. Ah, no donca, eh? l'è minga quel pover Gaitan e quella povera Savina forsi che te manten, brutto lizon?

PED. El pà donca?

LUI. Bell robb che l'è to pader: nissun sa nè cossa el guadagna, nè come el fà a guadagnaj. Semper ciocch tutt el dì, lu nol se cura de nient. Oh! l'è on bell robb anca lu.

PED. Oh! già, sicura!

LUI. Già, già, propi. Te gh'ee nè pontili, nè scrupol de coscienza a fà la vita che te fee. Coss'el sariss per ti levà sù a bon'ora a la matinna, tœu su la toa carretta e cor in verzee a fa provista de frutta, e andemo, ingegnass a tirat fœura on para de lira al dì?

PED. Adess, quand vegnarà i melon...

LUI. Che melon d'Egitt! Ti, quand l'è el temp di scires, te speccet che vegna i mognagh, dopo, i brugn e i persegh; insomma, te se ona bonna pell ti... Te finiree maa veh, a fa insci, tel disi mi.

PED. Lee l'è bonna domà de predicà... Peccaa

che la sia minga nassuda in d'on omm, che l'avariss poduu fà el pret, e a st'ora l'era già forsi arcivescov.

LUI. Ah, te gh'ee el coragg anca de ridegh adree a toa mader, eh? Dopo che parli per el to ben; ma mi veh sont bonna ancamò de datt di scuffiottoni, e fatt ubedi in diversa maniera, brutto lizon.

PED. Andemm, donca, sont chi.

LUI. Ah si, speccia mi. *(fa per avventarglisi contro)*

SCENA II.

Togn e detti.

TOGN *(entrando)* Cossa gh'è incœu per aria?

LUI. L'è quell lizon li de quell to fœu, ch'el tirariss fœura del birlo chi se sia.

TOGN Lassel on poo sta... Te see ben come l'è: e pœu cossa el fà, infin?... L'è li buttaa giò sul lett, sicchè me par ch'el nœuja a nissun...

LUI. Già, sicura; ti te ghe dee semper reson, perchè l'è ona baracca compagn de ti.

TOGN Come sariss a di, sura padronna? Mi sont on omm de rispettà, capisset? Mi sont on bullo, e gh'hoo paura de nissun... nanca de ti...

LUI. Ignazi, t'ee fenii de fa i somm?

IGN. Sì, mamma.

LUI. Ben, tœu su i tò robb, che te menni a scœula.

IGN. Andemm, mi sont a l'orden.

TOGN Voj sent, incœu cossa gh'è de bon?

LUI. Cossa gh'è?... Pan e minestra.

PED. Che lusso!

TOGN Fioi! Te me vœu fa fà on'indigestion, eh! sura padronna?

LUI. Fenissela de dimm padronna, perchè sont stufa.

TOGN Œu, œu, che ari! che suss! Cossa semm diventaa ristocrategh... Eh! voj Peder, che stuadin, eh!

LUI. Andemm, Ignazi, che sta gent chi gh'han bon temp. *(parte con Ignazi)*

TOGN Bon temp, a mi, Togn Bustella, primo facchino de Porta Cina! Dopo che sti noi chisgobben di cinqu or de la mattina finna ai vott o nœuf or! Bon temp! Mi che spedissi el borgh! L'è... l'è perchè l'è ona donna, se de no, giurabacco, ghe la faria vedè... A mi, Togn Bustella, dimm che gh'hoo bon temp... Dill ti, Peder...

PED. Ma e ti te stee li a dagh a trà a quell che dis quella bonna donna là?

TOGN Mi no... mi sont superficial, capisset, mi sont on omm che ghe passa sora a sti robb chi... Di on poo, se andassem là del Cristofen a beven on mezin, eh... Che ideja... sont tò pader e bott li... Andemm voj...

PED. Andemm. Te specci domà ti, mi!

TOGN Andemm, te diroo pœu on ideja... andemm, donca. *(parte con Peder)*

SCENA III.

Savina, abbigliata per sortire.

SAV. Se Dio vœur hin andaa... Che vergogna a ciappà semper la ciocca. Adess ciao, quell che l'è l'è, se pò pu faghel desmett quell vizi li... l'è tropp vecc... Ma quell che me pò minga passà l'è de vedè quell Peder li a fa mai nient tutt el di... Basta!... Capissi minga, chi sott a nun gh'è vegnuu a stà chi adess a Pasqua on gioven sol... sull'uss gh'è on begliett con scritt su « Ernesto Cresti, impiegato ». Defatti, el va fœura de cà a st'ora chi tutt'i matinn, el ven a cà a quatter e mezza... e... el me guarda semper cont on certo fa, che se ved vun propi de proposit, che scherza minga... Pœu, pœu, a di la verità, l'è minga mal... el tutt insemma l'è discret, e chi sa che di volt... Almen quest chi l'è minga comè quij pivej che ven adree a seccà la scuffia, e a di su domà asnad, che l'è robba de fai cor a scuffiott... El me despias minga! *(si batte all'uscio)*

SCENA IV.

Ernest, Savina indi Gaitan.

ERN. Se pò?

SAV. Avanti.

ERN. *(entrando)* (L'è chi sola). In grazia, el sta chi on certo Gaitan Bustella calzolar?

SAV. (Oh Dio! l'è lu). Sì, signor... voo a ciammall subet.

ERN. On moment, bella tosa, l'è forsi soa sorella lee?

SAV. Sì signor, per servill.

ERN. L'è finna di prim volt che l'hoo vista, che voreva parlagh, e...

SAV. A mi?

ERN. Sì, a lee...

SAV. Cossa l'ha de bisogn de mi?

ERN. On poo de ben, appena, appena...

SAV. Soo ben ch'el scherza, e me stupissi...

ERN. Citto, che la parla a pian... La m'ha mai vist donca lee a vegnigh adree tutt i matinn finna in contrada di Patee dove gh'è el soo magazin. Ah! sigura... la gh'ha reson, se la m'ha mai vist, la pò minga savè che gh'è ona persona che se occupa de lee, e tanto!

SAV. Mi, cara lu, ch'el scusa, ma soo minga cossa el vœur di.

ERN. Vuj di che mi ghe vuj ben, che sont inamora de lee, che vuj...

GAI. *(di dentro)* Savina, te see li?

SAV. Oh Dio, mè fradell... Sì, ven chi che gh'è chi on scior che gh'haa bisogn de parlatt...

Ch'el scusa, ma mi bisogna che vaga...

ERN. Quand l'è che se trœuvem, eh?

SAV. Chi sa?... reverissi... *(fugge via)*

ERN. Che tosa singlar. La me guarda, me par de vessegh simpategh, e pœu la scappa... *(passeggia)*

GAI. (*entrando*) Reverissi, l'è lu ch'ha bisogn de parlamm a mi?

ERN. Sì, l'era per on para de scarp...

GAI. Hin per lu?

ERN. Sì...

GAI. Allora ch'el favorissa a comodass, che ghe tœuj la misura...

ERN. Adess no, voreva digh de vegni de bass de mi inceù a cinqu or, perchè gh'hoo giò anca di scarp de dagh de giusta...

GAI. Lu el sarà servii. In grazia, l'ha ditt ch'el sta chi sott?

ERN. Sì, propi sott a sta stanza chi. Me ciami Ernesto Cresti, e pœu l'è scritt in su l'uss.

GAI. Va benon, allora sbagli pu.

ERN. Semm intes donca. Ch'el staga ben.

GAI. Reverissi, el vedarà ch'el sarà servii a penell. (*Ernesto via*) Saria curios de savè chi l'è che gh'ha insegnà a vegni chi de sora... Euh, del rest l'è natural... l'avarà domanda fors a la soa donna dove gh'era on bon calzolar, galantomm, svelt, e... lee la gh'avarà insegnà a vegni chi... Sì, sì, l'è insci... l'è ciara come el sò... Adess che ghe pensi, l'è già duu di che vedi minga l'Angiolina, e a di la veritaa sont on poo inquiett... Chi sa quand l'è che podaroo spossalla! povera tosa! ona perla. Lee l'è semper alegra comè on pess. Che bell caratter! (*vedendo comparire sull'uscio Teresa colla scopa in mano*) Oh! sura Teresa, che la vegna pur inanz.

SCENA V.

Teresa e detto, indi Luisa.

TER. Grazie. (*entrando*) L'è minga in cà la soa mamma?

GAI. L'era chi on moment fa; la sarà fors andata a menà a scœula el Gnazi.

TER. Per bacco le menna a scœula ancarnò? insci grand! Infin l'è appena chi fœura de l'uss. Ch'el guarda on poo se la Lusietta je mena a scœula i sò fioeu? E si ch'hin pussee piscinitt.

GAI. L'è perchè insci el se perd minga via coi alter barabitt.

LUI. (*di dentro*) Figurev, se l'ha de venc on ambo! (*entra*)

TER. Ciao Luisa, come te stee?

GAI. (*mette due stivali in un panno e si dispone ad uscire*)

LUI. Minga mal e ti? Ma te see minga che la Barborin l'ha ciappaa on ambo?

TER. Che cavigionna!

GAI. Che la guarda mamma che voo on moment a portà via sti strivaj chi. Reverissi sura Teresa!

TER. Ej, stia ben. (*Gaetano via*) Cossa te me cuntet! L'ha ditt già che sta volta doveva vegni el duu e el des. Capissi minga dove l'è andata a pescall el duu.

LUI. L'è el sogn che l'ha faa del sò mari!

TER. Che cavigionna! Pœuh! trenta franch hin quajcossa. L'è vera che in di sò man ghe duren vintiquattr'or fin sira.

LUI. L'è leccarda comè ona gatta!

TER. Lee la spend tutt coss per el paccià!

LUI. Minga comè nun vera!

TER. Oh, per mi tant, sont bonna de sta on ann senza tœu on'acqua!

LUI. E mi che mangi pan e minestra tutt l'ann!

TER. L'è perchè ti te see tropp bonna. Se te fasset lavorà on poo pussee quella bonna lana de quell tò mari, e quell lifrocch de quell tò Peder, forsi te podarisset mangià on quaj boccon de carna a la festa; ma insci te tocca a tirà la carozza coi busecch.

LUI. Come te vœu che faga?

TER. Mi se fuss in ti ghe dariss dent per dent on poo de decott de maneggia verda sui spall.

LUI. Sì, brava, fariss on bell noll. Te set minga che quand l'è ciöcch l'è pesg d'ona bestia.

TER. Speccia che la ghe passa, e pœu alon! se ghe parla ciar

LUI. L'è bell fà a parlà. Se te provasset, te vedariet che gust l'è a trattà quell'omm li... Me par de senti gent. Oh, chi vedi, la sura Angiolina.

SCENA VI.

Angiolina entrando, e dette.

ANG. Che la scusa, sura Luisa, ma mi gavariss bisogn on piasè.

LUI. Che la disa pur...

ANG. Voraria che la me imprestass per on'oretta el sò caldarin. El mè l'è bus d'ona part, e intant ch'el magnan le stagna, doprariess el sò per famm una zuppa.

LUI. Che la se figura! L'è giusta li ch'el fa nient. *(andando a prenderlo)* Che la tœuja, e che le tegna pur là fin che ghe comoda, perchè mi già el dopri de rar istess. *(Angiolina prende il pentolino nella credenza)*

ANG. Povera donna, sont persuasa! El Gaitan el sta ben?

LUI. Sì, l'è andaa on moment a portà via on para de strivaj.

SCENA VII.

Togn brillo di dentro, poi fuori, e dette.

TOGN *(cantando)* « Te sposaroo biondina, te sposaroo sì, sì. »

LUI. L'è chi quella pesta de quell mè mari!

TER. Oh Signor! ghe la doo come el vent. *(corre all'uscio e nel sortire viene abbracciata da Togn che entra)*

TOGN Oh! che bella ciappada. *(Togn è brillo di più).* Vieni qui... *(le va dietro a Teresa)*

TER. Ej, ch'el staga fermo, se de no ghe doo la scova su i corna, vedel mi!

TOGN Cœu, cœu che furia romana! Adagio... perchè mi...

TER. *(approfitta d'una voltata per fuggire).*

TOGN Te chi, te chi (*accorgendosi di Angiolina*)
che bella *temolina!*... Che la scappa no...

Sole degli occhi miei... La sa che lee l'è on
gran bell quartin de polaster! (*le si avvicina*)

ANG. (*allontanandosi*) Ch'el vaga a buttass giò
sur Togn, ch'el sarà mej!

TOGN No, Ninetta mia cara, mi vuj brasciatt su.

LUI. Voj, voj, o cioccatee, abbia on poo pussee
de riguard con la gent. Te gh'ee minga ver-
gogna, a la toa etaa, cont quatter fioeu?...

TOGN Cossè? Te see chi ancamo ti, seccada;
ma mi de ti soo nanca de cossa fann, brutta
veggia desgarbada... Mi vuj questa! (*fa per
abbracciare Angiolina, ma questa alzando il
caldarino gli tinge la faccia e le mani*) Ah!
sì... speccia mi... (*barcollando le corre appresso
finché entra*)

SCENA VIII.

Gaitan e detti.

GAI. Hoo do vedenn anmò mi; a fà de sti
robb chi a la soa etaa?

TOGN. Cossè? Cosse gh'è... Te ghe la toss
anca ti?

GAI. Disi domà ch'el dovaria pensà pussee a la
soa familia...

TOGN Che familia... Var pussee un biccerin de
grappa de quella giusta che tutt coss... An-
demm a bev mi e ti...

GAI. Comè?... el gh'avariss coragg de bev anca

mo che l'è lì ch'el pò pu stà in pee? Ch'el
vegna chi cont mi...

TOGN Dovè? a bev? bravo... andemm.

GAI. No, no, ch'el vegna cont mi; ch'el se
butta giò on poo, che dopo el sarà pussee
in gamba. (*lo prende*)

TOGN Va via, secca no, lassem sta.

GAI. (*lo piglia bene e dopo qualche contrasto
arriva a condurlo nella stanza*)

LUI. La ved sura Angiolina, che vita ne tocca
a fa?

ANG. Che la gh'abbia pazienza! Cossa la vœur?
l'è on dolor de coo e bisogna tegnissel.

LUI. De meneman che voo innanz, vedi che
se va de mal in pesg... Mah! me la vedi
brutta, ma brutta assee...

ANG. Che la sè cascia no sura Luisa. Che la
guarda: in mezz ai sò fastidi la gh'ha el
Gaitan, la Savina e el Gnazi che ghe vœu-
ren ben; l'è vera o no?

LUI. Oh sì, se ghe fussen minga lor, s'era già
in polver de bocca chi sa de quanto temp.
Come avariss de fà mi a viv se ghe fuss
minga quij fioeu li? E a pensà che l'era minga
insci mè mari, odess. Sti temp indree l'era
bon, quiett, el lavorava, el me portava a
cà di bon danee... e l'è domà adess, dopo
che l'ha cominciat a andà insemma a certi
baldracch, che l'è diventaa insci.

ANG. Sperem ch'el se cambiarà!

LUI. Sì, sì, la sà el proverbi del löff che lassa
el pel?

ANG. Speremm... la vedarà.
 LUI. Voo on moment de là a vedè cossa succed... Che la scusa. *(entra frettolosa)*
 ANG. Povera donna! Mi quand vegni in sta cà chi me senti a vegni sù la pell de capon minga tant per el sur Togn, come per el Peder... Oh Dio!... me par de senti la soa vòs...

SCENA IX.

Peder *entra cantando, e detta.*

PED. *(di dentro)* « Addio, mia bella addio »
(È brillo) Oh, che bella tosetta!... come la va?
 ANG. Ben... ben... ch'el staga ben. *(frettolosa fa per andarsene)*
 PED. *(fermandola)* On moment, diavol... ghe foo paura mi... Neh, che la senta...
 ANG. L'ha capii de lassamm andà...
 PED. Ceu che fiasca, cossa ghe foo infin? Ven chi Ninetta, famm on basin.
 ANG. Ch'el staga indree, se de no vosi.
 PED. Ah! si... te fee el mul ti... Speccia mi. *(fa per abbracciarla)*
 ANG. Ajutt, ajutt.

SCENA X.

Gaitan *accorrendo, e detti.*

GAI. *(nello svincolare Angiolina)* Lassa andà su-bett quella tosa, o brutto cioccaton.
 PED. Cossè?... te vœut on papis anca ti eh!

GAI. Tas, veh, se de no te doo vun de qui ten a ment che te see regordaree fin che te scampet.
 PED. Pover fiœu, l'ha mò de nass ancamò quel bullo, capisset?
 GAI. Ah si... *(fa per piombargli addosso)*
 ANG. *(stringendolo e fermandolo)* No, Gaitan, fa piasè sta quiett, sia savi, lassel sta... el sa manca lù cossa el se fà.
 PED. El soo si, el soo... brutta frignetta.
 GAI. Lassem andà Angiolina, lassem daghen quatter, famm sto piasè.
 PED. Ven innanz andemm, sont chi... alto sur bullo! *(succede un contrasto tra Gaetan e Angiolina, di modo che nel punto che Gaetan sfugge dall'amante e corre addosso al fratello pigliandolo pel collo, entra Luisa)*
 LUI. Cossa l'è sto frecass? *(Gaitan lascia andare Peder)* Vergogna! hoo de vedenn ancamò adess? *(a Peder)* Cossa l'è che te ghe faa?
 PED. Hin minga cunt de dagh a lee.
 LUI. Rispond, cossa l'è che te ghe faa? Vuj savell?
 GAI. L'è che lu l'era chi cont l'Angiolina, e el ghe cors adree per brascialla sù: lee la vossaa: mi sont cors chi, emm fa di ciacer finna che...
 LUI. Brutto lizon, *(a Peder)* cioccatee... fani-goton.
 PED. Ej, che la guarda cossa la dis, se de no...

LUI. Se de no cossa? avanti!... Te vorarisset batt toa mader? Ma prima che te me mettet adoss on dit, guarda, (*afferrandolo*) mi te schisci. (*lo getta a terra*)

GAI. } Ah!
ANG. }

LUI. Oh! povera mi! coss'hoo mai faa!

FINE DELL'ATTO PRIMO.

ATTO SECONDO

Stanza di lavoro in casa d'Angiolina; tavolo in mezzo pel lavoro di stiratrice; assa, ferri, ecc.

SCENA PRIMA.

Angiolina sta stirando, **Ninetta** dà l'acqua alla biancheria, indi **Gaitan**.

ANG. Fà prest Ninetta, che incoeu l'è giamò sabet.

NIN. Oh, la fa a temp l'istess... gh'è minga denter robba d'impegn, sicchè...

ANG. Va benissimo tutt coss, ma quand la robba l'è tanta, ghe vœur el sò temp a sopressalla. Me secca che gh'hoo denter tanti coj de quell cinciapetta de quell sur Leander, che l'è mai content. O hin tropp dur, o tropp moll, o ghe manca el lucid. Ah, Signor... se tucc fussen insci, faria di bej guadagn anca mi.

GAI. Se pò?

ANG. Avanti. (*Gaitan entra*) Oh, te see ti? Settes giò on moment.

GAI. Adess gh'hoo minga temp de sta chi... Ghe quaj coss de sòra che buj, ma assee!...

ANG. Cossa gh'è adess? quaj coss d'alter de nœuv?

GAI. Figuret ti. Te see che mi gh'hoo daa i

danee al pà per pagà el fitt. Pos diman l'è Sant Michee, sicchè gh'era minga temp de trà via. Ben, induvina on poo, cossa l'ha fa el pà? L'ha ciappaa i sò bravi danee, capisset, l'è andaa a l'ostaria, e là i ha fogaa tucc in d'ona giornata sola coi sò baldracch.

ANG. Ma come t'ee faa a savell ti?

GAI. Comè, com'hoo fa? Pocch fà gh'è vegnù in ca el sur Batista, el refitù, e li, cont on fa de fort el se mettuu a sbragià perchè avevem mo nanca de pagà el fitt. • Come? ghe disi mi, l'è già pussee de vott di che gh'hoo dà mi al pà i 60 franch che ghe vegneva. — Che sessanta franch! el dis lu, soo nanca de che color sien fin dess i sò danee... — Diavol, disi mi, me par finna impossibil. • Mi alora l'ho pregaa de spetà finna doman matinna, che stasira, quand vegneva a cà el pà gh'avariss ciamaa.

ANG. Va ben, ma fin dess te me mo de di come t'ee faa ti a savè che to pader l'ha spenduu a l'ostaria i danee che t'ee ghe daa.

GAI. Abbia pazienza, che te savaret tutt coss. Apenna via el sur Batista, me fradell el, Peder, che segond el sò solit l'era là buttaa giò sul lett comè un lizon, el me cunta su la fin che aveven faa i danee del fitt, e che l'aveva jutaa anca lu a godi; te capisset adess?

NIN. Ej, sura Angiolina, hoo de pizzà el fornell?

ANG. Sì, fa prest, ch'hin già vott e mezza. Sent

Gaitan, mi t'hoo già ditt tanti volt che bisogna vegninn a vœunna tant cont to pà come col Peder, e tant ti come toa sorella dovarissev vègh scrupol de coscienza a mantegnigh i vizi a quella manera li.

GAI. Prœuva a dighel ti al pà?

ANG. Mi? ma te see matt? L'è bon de damm on parer sui moll.

GAI. Tira minga a man... el gh'ha sudizion de ti.

ANG. Bella sudizion! El voreva brasciamm su domà!

GAI. Bisogna minga guardagh a quij robb li; perchè lu in quel moment là el saveva minga cos'el se fava. L'era mezz in gajna.

ANG. (a Ninetta) T'ee fenii de preparà sto fornell sì o no?

NIN. L'è insci del temp che l'è all'orden.

ANG. Mett su i fer donca!

NIN. Hin su, hin su!

GAI. Sicchè, Angiolina, sia savia, digh ti ona quaj paroletta al pà? Te me farisset, guarda, on servizi d'òr.

ANG. E pœu se foo on bus in l'acqua?

GAI. No, no... te see tanta brava ti!

NIN. Ej, sur Gaitan, l'è bon de digh al Gnazi de lassamm sta quand el me trœuva sui scal?

GAI. Perchè, cossa el te fà?

NIN. El me fa semper immati: o el me cascia in del copin i sassit, o el me spara in faccia i gandelitt de scires. Insomma, l'è cativ.

GAI. Ben, ben, ghe diroo de lassatt stà, sta quieta. (*ad Angiolina*) Mi voo, me raccomandandi a ti Angiolina. Apenna che vedi el pà, t'el mandi chi cont ona quaj scusa.

ANG. Sì, ma sent, te see bon domà de fa el grazios quand t'ee bisogn quajcoss?

GAI. No, no, sta quieta, te vuj ben, e vedi l'ora de menatt a cà mia.

ANG. Quand pœu?

GAI. Prest... pussee prest de quell che te se credet. (*toccandole la mano*) Ciao..... se vedaremm sta sira.

ANG. Sta ben... me raccomandandi neh!...

GAI. Sì, sì, sta quieta. (*via*)

SCENA II.

Angiolina, Ninetta, indi Peder.

ANG. Fa prest, Ninetta, t'ee preparaa l'amid?

NIN. Sì, ghe cala domà l'azzur.

ANG. Cià chi mi..... (*mette nel catino l'azzurro e sbatte*) Mi voraria mai che vegniss el sabet. Tucc me porten la roba de sopressà al venerdì e pretendarissen de vess servii sul moment. Finna che se tratta de coj, camis, fazzolett, pazienza! ma se gh'è de incannettà ona quaj portina, o scuffi, o gener difficil, te saludi alora... (*sopressa cantando*)

PED. (*entra circospetto*) Se pò?

ANG. Reverissi. (*seguita sempre a stirare durante il dialogo, cantando di tanto in tanto*)

PED. L'è ancamò in colera cont mi?

ANG. Per cossa?

PED. Ma sì, per l'affare d'injer matinna.

ANG. Ahn!... œuh, cialad! l'era l'aquavita che le fava parlà... Compatissi. (*canta*)

PED. L'è ben alegra incœu?

ANG. Quand l'è che sont rabiada fors mi?

PED. Quell l'è vera; però minga semper i robb van ben, e...

ANG. Oh, per mi poss propi di nagott... De fastidi ghe n'hoo no... la salut, grazia a Dio, ghe l'hoo, el lavorà el me manca minga, me vœuren ben tucc, sicchè cossa hoo do vorè de pu?

PED. Beata lee che la ghe va su bella...

ANG. In quand a l'andà su bella pœu adasi, perchè infin di fatt se no lavorass de gombet, capissel, podaria minga famm ciar... Voj, Ninetta (*a Ninetta*) mett dent on poo de carbon in del fornell...

NIN. Subet... (*eseguisce*)

ANG. E lu l'ha lavoraa sta matinna?

PED. Mi?... Coss'hoo de lavorà... (*gira il berretto fra le mani*)

ANG. Comè, el fà el scior lu?... (Euh! l'è on bell mestee anca quell. (*canta*).

PED. Come sariss a di?

ANG. Che mi se fuss in lu, el diria nanca per rid ch'el fa el fenean... Ma ch'el me disa on poo?... Che sodisfazion el proœuva lu a fà nagott?

PED. E lee che gust la ghe trœuva a lavorà de copass?

ANG. Mi che gust ghe trœuvi? Prima de tutt se fass come el fà lu podaria minga viv del cert, perchè gh'è nissun che me ne dà... Segond pont, saria bonna no a fà nagotta tutt' el di... Mi soo minga come se poda fà...

PED. Povera tosa.... ghe vœur pocch a fà la sciora in giornada.... De gioven en manca mai....

ANG. Ehi lu, ch' el faga piassè a mocalla, e subet. Ch' el se regorda, che mi sont semper stada rispettada de tutti, e gh'è mai staa nissun che m'abbia tratta a la maniera che l'ha faa lu adess. Ch' el faga piassè a andà fœura de cà mia.

PED. Comè, se pò pu nanca scherzà adess?

ANG. Scherzà? Ma se pò forsi scherzà sora on argoment tant delicaa? El ghe dis scherzà lu a ofend ona povera tosa onesta? El compatissi perchè i sò paroll me fan nè cald nè frecc....

PED. Là, là.... che la vaga minga in furia....

ANG. Mi in furia? S'era li per andagh difatti in furia, ma pensandegh su ben hoo vist che vareva propi minga la penna.

PED. Sicchè donca la me considera propi nagotta mi, eh?

ANG. Quand vedaroo che lu el mudarà vita, ch' el lavorarà, ch' el sarà de ajutt, de consolazion a la soa familia, allora podaroo forsi considerall on quaj cossa, ma per adess....

PED. La vedarà.... mi vess minga bon de gua-

dagnamm on sold? Le dis lee, le dis..... mi sont bon pussee de lee, capissela; oh! la vedaremm....

ANG. Va ben, va ben.... se sarann rœus fioriran. *(canta)*

PED. (Oh, vuj propi fagh vedè mi se sont minga bon de lavorà!) Reverissi.

ANG. Stia ben.

PED. *(sorte colla testa bassa strascicando il berretto colle mani.)*

ANG. Quell l'è ona lana! Povera gent.... ma povera de bon, quand se gh'ha sui spall de quij afari li.... Ninetta.....

NIN. Cossa l'è?

ANG. Te see stada a tœu de colazion?

NIN. Mi no....

ANG. Ben guarda, va li sul pont a tœum on etto de salamm de testa, cont oaa misturina, neh.... *(dando i denari)* Tœu: guarda che l'è on Cavorin, neh.

NIN. Sì, sì, diavol.... sont minga on bagaj, vedela. *(esce)*

ANG. Già, già, l'è ona gran donascia.... *(canta)*
Che bella giornada che l'è inœu, gh'è fœura on sò ch'el va propi ben per mi. *(lavora)*

SCENA III.

Angiolina e Teresa.

TER. *(con fagotto)* Ehi, reverissi, ghe porti chi i fazzolett del sur Bartolamee ch' hoo lavaa jer sira al foss.

- ANG. Va ben, grazie.
 TER. Gh'è nient de nœuv incoœu ?
 ANG. Cara lee, cossa la vœur mai che sappia mi, che stoo in caponera tutt el di? Lee putost che la gira, la savarà i novitaa...
 TER. Œuh, ma certi robb però se veden anca senza vorè....
 ANG. Come saria a di ?
 TER. La sa nient de l'intrighett chi de sora ?
 ANG. Che intrighett ?
 TER. Ma sì, diavol, el ticch e tacch de la Savina col sur Ernest ? quell'impiegaa che sta chi a uss a uss cont lee ?
 ANG. Comè ?
 TER. Oh, diavol!... el sann tutti...
 ANG. Via de mi però....
 TER. Ma la sa propi nagotta lee ?
 ANG. Ma ghe disi de no.
 TER. El sur Ernest l'ha de vess inamoraa come on gatt de la Savina; l'è già chi on poo de temp che le cura, el ghe va adree, le compagna a scœula;.... e jersira hinn staa veduu insemma a parlass.... Capissela ?
 ANG. E per quell el vœur di, che lu el ghe faga l'asen ?
 TER. Œuh, vanza temp.... Ma tutti sti cincia-pett de tosann quand veden on quaj pivell che sta li sul guarda-voi, e che ghe cor adree, se po di che....
 ANG. Cossa ?
 TER. Insomma.... no so se me spieghi.
 ANG. E lee la credaria che la Savina l'è...

- TER. Mi credi nagott... l'è anca lee ona tosa comè on'altra. Insomma l'è giovena, putost bella, senza pratica del mond, e l'è facil... la sa ben.... a tœu su di topicch.
 ANG. Mi però credi nò ch' el sur Ernest...
 TER. Oh, santa pazienza. . . te chi cossa me capita ! El sur Ernest l'è anca lu on omm comè on alter : l'è cacciador e bott li. La credaria forsi che on impiegaa l'avess de bassass a sposà ona madamin, ona povera tosa d'on fachin semper in gajna tutt el di ? Povera Angiolinetta !
 ANG. L'amor el guarda in faccia a nissun, cara lee.
 TER. Sì, ma hin passaa i temp che i duca e i cont sposaven di mezz calzett: in giornada vœuren el pelter, capissela; e pur tropp vedi in general che i danee hin quij che fa vegni sapient i asen, bravi i balord, bon i manegioni, e scœuja mi, e nun, capissela, con tutta la nostra abilitaa saremm semper pover donn.
 ANG. Sì ben, ma el sur Ernest però el me par on bravo gioven...
 TER. L'è anca lu on omm comè on alter.
 ANG. Andemm adasi a pensà mal... quand avaroo vist mi coj mè œucc, allora credaroo.

SCENA IV.

Savina abbigliata, e dette, indi Ninetta.

SAV. Ciao Angiolœu, sont passada dent a saludatt prima de andà a bottega.

ANG. Brava, gh'hoo giusta bisogn de parlatt...
 SAV. A mi?
 ANG. Sì, a fi.
 TER. Allora mi ve saludi (*ad Ang.*) (Che la ghe disa minga che sont stada mi, neh!)
 ANG. (Diavol, cossa la me cred?)
 TER. Stee ben, neh tosann.
 SAV. Reverissi, sura Teresa. (*Teresa via*)
 ANG. Sent on poo, Savina, l'è vera la storia che gira in la porta che te se fet cor adree el sur Ernest?
 SAV. Ernest?... Ma che Ernest?
 ANG. Ma sì, l'impiegaa che sta chi fœura?
 SAV. Ahn!... cioè... mi...
 ANG. Ah! l'è vera donca! Guarda cossa te fee veh Savina! Guardet ben!
 SAV. Hoo faa quaj coss de maa forsi?
 ANG. Disi minga quell, ma guarda che se fa prest a perdes.
 SAV. In fin el m'ha ditt che s'el me fa l'amor, l'è perchè el gh'ha di bonn intenzion.
 ANG. Ah! el t'ha già ditt tutt sti robett, eh? Fioeuj... vee a vapor vialter, me par.
 SAV. A vapor! El sarà on mes bon che matinna e sira el me ven adree in strada. El m'ha tentaa... l'ha faa tanti volt per parlamm, e mi a di la veritaa, quantunque el me piassess, gh'hoo però mai daa ascolt, quand jer sira chi de bass, intant che gh'era nissun, el m'ha giuraa e spergiuraa ch'el me voreva ben, ch'el me avariss sposaa... de manera che mi....

ANG. T'ee fenii a dagh a traa, e digh che anca ti te ghe vorevet ben a lu...
 SAV. Sigura... (*abbassando la testa*)
 ANG. Sent Savina, te see che mi te vuj ben e sont sincera. Te vœuet on parer?
 SAV. Sì...
 ANG. Sta sul tò, digh insci quand t'el vedet, che ti te ghe parlaret ancamò quand l'avarà decis de sposatt, e domà allora quand se sarà faa i publicazion... T'ee capii?
 SAV. Sì... va ben, gh'el diroo. Ma chi l'è che t'ha ditt a ti che mi...
 ANG. Nissun... l'è la vos de la porta.
 SAV. Cioè la sarà stada quella sabetta de quella sura Teresa ch'avarà spampanaa per tutt i fatt mè...
 ANG. No, l'è minga lee, sta quieta.
 SAV. Sì, l'è lee, perchè jer sira no la m'ha vist alter che lee insemma al sur Ernest...
 ANG. Insomma l'è minga lee... diavol.
 NIN. Ecco la colazion. — Vinticinqu del salamm e tredes de la misturina fa trentott. Ecco, che la tœuja el rest... (*glielo dà*) Che la guarda se va ben.
 ANG. Sì, sì, l'andarà ben... (*mette il denaro in tasca*) T'ee ditt che te vet a bottega ti Savina?
 SAV. Sì, perchè?
 ANG. Perchè te compagni on tocch. Voo chi ai Colonn de S. Lorenz a portà via sti coj chi, se de no el sur Carletto chi sa cossa el dis. (*mette i colli in una cesta*) Voj, Nineta, lassa minga mori el fornell, neh!

NIN. No, no.

ANG. Se ven quajghedun, vegni subet. (*esce con Savina*)

NIN. Sanguanon, gh'hoo ona famm che ghe vedi pu. Hoo già faa dò colazion e l'è come se avess nanca mangiaa. (*mette carbone nel fornello*) La sura Angiolina l'ha ditt che la ven subet indree... mej, insci la farà colazion e la me vanzarà quaj coss anca a mi...

SCENA V.

Ignazi sull'uscio con cartella in collo, e detta.

IGN. Ghigna, ghigna, la polpettina...

NIN. Va via, voj ciall...

IGN. (*gli getta una palla di carta*) Te ghe sèt?

NIN. T'ee capii de sta quiett.

IGN. Euh! cossa te voset... El par che te squarta...

NIN. Insomma va via, lassem sta, seccada.

IGN. Te stee li eh! a vosà.... ven de fœura....

NIN. Sì, per fà che te me impienisset el copin de sassit, eh?... Pipilimerli!

IGN. No, no, te foo nient... ven chi...

NIN. (*avanzandosi*) Te staree savi?

IGN. Sì....

NIN. (*va fino all'uscio dove si trova Ignazi; questi quando è vicina gli getta adosso una manata di farina*) Ahi, brutto barabba!

IGN. (*nel fuggire è trattenuto da Luisa e Gaitan che gli danno un scappellotto e parte*)

SCENA VI.

Luisa e Gaitan, indi Angiolina, e detta.

GAI. (*sull'uscio*) Tòù, porchett, va a scœula, e subet... (*a Ninetta*) Cossa el t'ha faa chi?

NIN. El ma impienii tutta de farina. (*pulendosi*)

LUI. L'è on gran desasi d'on fiœu....

NIN. L'è dispresios assee... quand el me trœuva el me lassa mai sta.

GAI. Ben, ben, sta quietta che inceeu per sinistra ghe daroo quatter scuffiott. Di on poo, l'Angiolina dove l'è?

NIN. L'è andada chi da bass a portà via di coj soproressaa.

GAI. La sta via on pezz?

NIN. No, no, la mò nanca de fà colazion!

LUI. Spetemmela on moment. Ma dimm on poo come la faremm nun col sur Batista, el refitù?

GAI. Cossa la vœur che ghe disa? On quaj sant provedarà!

LUI. Povera nun! Ma com'hemm mai de fala adess, eh?

GAI. Se quel lizon d'on Peder el lavorass anca lu, sarissem minga in la condizion che semm! Bisognava finna de quand l'era piscinin a dagh di bon scoffiottoni quand el fava el pigher, minga protegge. Se dent per dent l'avesssem coreggiuu, o che sì, o che no, adess el saria minga la lana che l'è. Mi però, vedela, invece d'aveghen a maa, la ringrazia-roo semper di lezion che la m'ha daa. Almen adess gh'hoo la consolazion de vess de ajutt a la mia famiglia.

LUI. Là, là, adess lassemm stà quij robb chi.
Ho sbagliaa, l'è vera, el vedi adess... ma
alora come podega fà?

GAI. Povera donna: mi la compatissi de cœur,
e savaria minga cossa fà per podè tirass
fœura do sto tribuleri chi.

ANG. (*entrando colla cesta vuota*) Oh! cossa
gh'è de nœuv?

GAI. Insomma Angiolina, nun semm desperaa...

ANG. Cossa gh'è?

GAI. El sur Batista, el refitù, l'è staa desora,
el n'ha ditt, che se per doman ai tre or pa-
ghem minga el fitt, el ne lascia fœura de cà...

ANG. Oh Dio, che disgrazia! Ma te ghe minga
ditt?...

LUI. Oh sì! la voruu senti nè legg, nè fed...
Povera nun... pover i mè fiœu. (*piange di-
rottamente*)

ANG. Là, là... che la se dispera no, che veda-
remm de rimedià...

GAI. In che maniera? Chi l'è che te vœuret che
me impresta sessanta franch? Eh! se mi
voo a cercaj te see cossa me risponden?...
Questa l'è l'ala, perchè disen che nun gh'emm
pu de credit, e difatti gh'hann reson. Come
emm de fa a vegh credit? El pà semper
ciocch, el Peder imbragon e fanigoton anca
lu... mi sont minga conossuu... Sì, sì, podem
andà a butass tucc in del navili quand se sia.

ANG. Gaitan, fà minga insci... adess vedemm
se se pò rimedià... Mi per adess podi datt
quaranta franch, che l'è el me risparmi...

Doman matinna voo al Mont, impegni quatter
d'alter barlafus, e cerchi de tra insemma i
alter vint franch.

GAI. No, no, povera tosa, ti te see tropp de
cœur, e nun in coscienza podem minga ac-
cettà che ti te faghet on sagrifizi de sta sort.

LUI. Sì, sì, l'è vera, el saria tropp.

ANG. Gaitan, famm sto piasè, accetta.

GAI. Per adess scusem, Angiolina, mi te rin-
grazj, ma poss no...

ANG. Alora disi che ti te me vœuret ben pu,
che ti te see de cossa fann de mi... che ti
te me tegnuu tutt'alter che per ona tosa
ch'ha de vess on di toa miee...

LUI. Ma no, cossa la dis?

GAI. Ma Angiolina, sent per caritaa...

ANG. Lassem sta... el to refud el m'ha daa vun
de quij dispasè veh, che (*piangendo*) el me
passarà pu... Bell'amor... bella afezion... bella
confidenza!... povera mi, come sont mai di-
sgraziada! (*cade sulla sedia*)

GAI. Angiolina, mi te ciami scusa del dispasè
che t'hoo daa... (*avvicinandosi, ed abbassan-
dosi su lei con difficoltà dice*) Accetti...

ANG. Oh, davvero? (*alzandosi e precipitandosi
al suo collo*) Gaitan... te ringrazi... capissi
che te me vœuret ben anca mo... Oh! come
sont contenta... hoo mai provaa ona soddi-
sfazion come quella d'inœeu. (*Luisa piange,
Angiolina abbraccia Gaitan*)

FINE DELL'ATTO SECONDO.

ATTO TERZO

Camera de l'Atto Primo ridotta in uno stato piú miserabile
— il letto con pagliericcio — due sedie di lisca lacere,
un tavolo di pecchia zoppo.

SCENA PRIMA.

Peder solo.

Corpo d'ona pipa! Che mi abbia de vess bon
pu de lavorà? L'Angiolina, chi sott, la m'ha
ditt dò o trè reson che brusen on poo la
pell... Consideramm per on fuston de verzi!...
Mi m'è pussee de car che me disen su la
faccia qualunque robba, via de quella de vess
cuntaa per nagotta... Eppur, la gh'ha reson...
tutt i reson del mond! Difatti, che vita l'è
la mia?... Mangià, bev, dormi e ciappà di
ciocch col Bisc e col Tanella... No, no, chi
bisogna decides... Lavoraroo anca mi, se de
no chi sà dove andaroo a feni... Andemm...
ciapemm la carretta e...

SCENA II.

Batista e detto.

BAT. Gh'è nissun?

PED. Oh, reverissi sur Batista; el voreva quaj
cossa?

BAT. El gh'è minga sò fradell?

PED. No, signor, l'è andaa via on moment...

BAT. Ben, ch'el ghe disa ciar e nett, che incoeu
ai tre or el specci coi danee del fitt... se de
no per vora de sira, march! spazzetta de
chi... L'ha capii?

PED. El fitt?... Ma l'è anmò de pagà?

BAT. Se l'avessen pagaa, ghe diria minga quell
che gh'hoo ditt.

PED. Ma in che maniera?

BAT. In che maniera?... In la maniera che vialter
fanigotoni pien de vizi fee de solit.

PED. Ehi, ch'el guarda come el parla.

BAT. L'è minga vera forsi? Comenciand de lu...

PED. Mi?... L'è vera... el gh'ha reson... ma
d'ora in avanti lavoraroo, el vedarà...

BAT. Sì, sì, va benon... Hin i solit ciacer de
qui taj che fan i debit e vœuren minga pagaj.

PED. Sur Batista, ghe raccomandandi de sta in di
termen, se de no...

BAT. Avanti, se de no, cossa? Brutto cioccon!

PED. Insomma, le feniss, o no? (*minaccioso*)

BAT. Sì, sì, la finiroo... incoeu a tre or el
vedarà come la fenissi mi.

SCENA III.

Ernest e detti.

ERN. Se pò?

BAT. Oh! sur Cresti, come el sta?

ERN. Minga mal... s'era vegnuu chi per quij
scarp...

PED. Ah! vedi, el cercava forsi el Gaitan...
adess el ven subet.

ERN. E la soa sorella la sta ben?... L'è già
andada?

PED. Sì, perchè?

ERN. Oh! nient, ciamava...

BAT. Sicchè, l'ha capii... o i danee del fitt... o
fa spazzetta...

ERN. Comè, comè?

PED. Oh, nient. (*mortificato*)

ERN. Ma se pò savè sur Batista?...

PED. L'ha capii?...

BAT. Che capii d'Egitt? L'era per el fitt... ch'el
se figura, sur Cresti, per strasc de sessanta
franc m'avaràn già fa fà ona vintenna de
strad.

ERN. Sessanta franc? Ma l'è chi tutt el bobaa?
Perdianzen! cossa sont mi? bon de nagotta?...
(*cavandosi un portafoglio*) Ch'el tœuja, sur
Batista, quist hin trii bigliett de vint...
ch'el ghe faga la ricevuda in testa soa, l'ha
capii?

BAT. Ma comè, lu el vœur?...

ERN. Ch'el ciappa, e ch'el faga quell che l'ha
de fà.

BAT. (Che ghe sia propri dent quaj cossa cont
la tosa? Adess capissi perchè l'ha ciamaa se
l'era già andada via! La gh'aveva reson la
Togna, la pesséra sul canton).

ERN. Sicchè, sur Batista, l'ha fenii?

BAT. Adess voo a fagh la ricevuda, e ghe la
porti chi subet, va ben?

ERN. Sì, sì, ch'el faga prest... (*Batista parte*)
PED. Insomma, chi l'è lu?... che almen poda
ringraziàll de la bonna azion che l'ha faa.

ERN. Mi sont el vesin che sta chi sotta... Forsi
on di podaremm entrà in relazion pussee
stretta tra mi e lu... Per adess ghe disi
nient alter... a rivedersi...

PED. Ma insomma, ch'el senta... (*Ernest parte*
senza voler sentire altro)

SCENA IV.

Teresa e detto.

TER. L'è fœura de cà la Luisa?

PED. L'era chi domà adess... e...

TER. Coss'el gh'aveva el sur Ernest?...

PED. Oh, nient... l'era vegnuu chi per on para
de scarp.

TER. Ah! vedi, credeva ch'el fuss per on alter
afare...

PED. Che afare?

TER. Ma sì, diavol... per la Savinetta.

PED. Che Savina?

TER. Diavol!... ma la soa sorella...

PED. E lee la dis che lu...

TER. Già... che lu l'è l'amis de lee.

PED. Ah, canaja! Adess capissi perchè l'ha pagaa
el fitt per nun...

TER. Comè... l'ha pagaa lu el fitt?

PED. Ma sì, chi, domà adess... el gh'ha daa trii
bigliett giald al refitù... Ah! povera mi!
coss'hoo mai faa!

TER. Comè, el se cascia lu? Vorariss trovann vùn anca mi che m'avess de pagà el fitt...

PED. Ma la capiss minga che nun semm disonoraa adess?

SCENA V.

Togn e detti.

TOGN (*che ha udito le ultime parole, entra precipitoso*) Disonoraa t'ee ditt... ma chi l'è che è disonoraa ch'insci?... Parla... rispond...
(*pausa*)

TER. Ecco, ghe diroo mi come l'è. El sur Ernest, quell gioven che sta chi sott, l'era chi intant ch'el sur Batista el bataiava col Pedrin per i danee del fitt. Lu, sto gioven, dolz come l'è de cœur, l'ha tiraa fœura i danee e ghi j'ha daa.

TOGN Coll'idea però de restituighi vera? (*a Peder*)

TER. Diavol, s'en parla nanca! Ben, sto gioven chi el dis de vess disonoraa per sta robba chi; che ghe le disa lu adess.

TOGN Peder, l'è vera?... rispond. (*a Peder*)

TER. Ma si, diavol, s'era chi mi, e me par che...

TOGN Basta insei, andaroo mi a savè la veritaa...

TER. L'è vera, per diana, en disì minga, vedel, mi de ball.

TOGN Basta insci... lassem stà che incoeu sont danaa che ghe vedi pu.

TER. (Chi l'è mej daghen dò dida). Reverissi, sur Togn. (*parte*)

PED. Vegni anca mi...

TOGN Dove?

PED. Ma, andava in verzee per lavorà...

TOGN Fermes... (*pausa*) Te see cossa diseven li del tabacchee de nun?

PED. Mi no.

TOGN Che mi tradissi la mia famiglia, e che ti...

PED. E mi, cossa?

TOGN E che ti, on poo ancamò che t'ee andavet innanz insci, t'avarisset fenii a fa la figura del Bisc e del Tanella, quij duu bej mobil de quij tò amis.

PED. Ma cossa gh'è success?

TOGN Cossa gh'è success?... Hin duu lader.

PED. Euh!...

TOGN Sta nott gh'è andaa a cà i guardi de questura, e i han menaa via tutt duu, perchè aveven robbaa...

PED. Oh! che baloss!

TOGN Ah! te se sentet a revoltà anca ti, eh, all'ideja de fa el lader?

PED. Gajjna finna che te vœuret, ma mai canaja...

TOGN Che gajjna?... Bisogna cambià vella.. bisogna lavorà, capisset...

PED. Cossa s'era forsi adree a fa mi adess?

TOGN De bon?... propi de vera?

PED. Sì, parola de fachin galantomm.

TOGN Allora, quand l'è insci, va... cor, ten a man el temp.

PED. Addio, pà... se vedarem sta sira. *(parte)*
 TOGN Canajoni!... ladroni... Anca mi però podi squasi mettem insemma a lor... Robi minga anca mi i danee a la mia cà forsi? Invece de portagh a la mia veggia quij quater sold che guadagni, voo minga forsi a bevi sù cont certi amis balord finna ch'hemm perduu la reson?... Baloss mi, e pœu baloss finna che scampi!... E pur mè fiœu el gh'aveva reson! Semm minga disonoraa forsi nun? Ma, l'è fenida... Oh! per adess la sarà propi fenida de bon. Vedaran sti quattr'oss chi cossa saran bon de fa... Oh, vedaran!

SCENA VI.

Batista e detto.

BAT. *(con una carta)* Ghe porti la ricevuda del fitt.

TOGN Che ricevuda?

BAT. Ma sì, pocch fà el sur Ernest el m'ha pagaa el sò fitt, el m'ha ditt de fagh la ricevuda in testa soa...

TOGN Va ben...

BAT. Son contenton anca mi, perchè a di la veritaa l'è on bravo gioven, e la soa tosa la sarà fortunada.

TOGN Ma che tosa?

BAT. Ma la Savina...

TOGN E cossa el s'intend de di? *(con ira minacciosa)*

BAT. Mi?... Disi nagott, mi... L'è la vos che cor...

TOGN E sta vos cossa la dis? *(avvicinandosi come sopra)*

BAT. La dis che el sur Ernest el fà l'amor con la...

TOGN *(pigliandolo pel collo e non lasciandogli finire la parola)* E ti te credet, eh? brutto buffon?

BAT. Ahi, ahi! ch'el me lassa andà...

TOGN Fœura, quij, sessanta franch... *(lo lascia)*

BAT. Comè?... el vœur fa anca el lader?

TOGN No, foo minga quell mestee li, mi... gh'el lassi fà de lu... brutto pilatt... Fœura, quij sessanta franch.

BAT. Ma comè?...

TOGN El capiss minga che vuj restituighi a quell ch'ha voruu disonorà la cà mia? Che vuj andà a sbateghi su la faccia... Dopo lu ch'el me faga mett dent... almen dirann che me sont fà mett in preson per debet, per salvà l'onor de la cà. Fœura, disi... usurarj... fœura, quij danee.

BAT. *(cavandosi il portafogli e levando il danaro)* Ecco... ma per sta sira ch'el se prepara a fà spazzetta de sta cà... *(parte)*

TOGN Spazzetta! mi?... ma dove hoo de andà?... dove dormì cont la miee, i fiœu?... Ah! mond canaja! mond baloss! No, no... lu ghe n'impò minga... Sont mi el canaja, sont mi el traditor di mè fiœu, sont mi che meriti el disprezz de tutti... Alto, vegnii chi, schi-

scel sto baloss, fenill ona volta per semper, che gh'avii tutt i reson del mond... Castighel sto pader pien de vizzi finna al coll, che l'ha fenii a rovinà lh'a soa famiglia al punto de butalla su ona strada in l'ultima miseria... Maledizion a mi, sì, mandemela (*colle mani alzate in alto*) che me la sont meritada. (*cade sulla sedia*)

SCENA VII.

Angiolina entrando, si ferma, indi si avvanza, e detto.

ANG. (L'è chi sol... chi bisogna parlagh.) Sur Togn?... Neh, sur Togn? (*avvicinandosi e toccandolo sulla spalla*) Ehi, sur Togn?

TOGN Chi l'è? (*di soprassalto*)

ANG. Son mi, son mi... ch'el se stremissa no. (Oh Dio, soo minga come comincià!) E insci sur Togn, el gh'ha sossenn de lavorà?

TOGN Oh! per in quant al lavorà men manca mai...

ANG. Quell li l'è on gran benefizi, perchè finna che se lavora ven minga di penserativ... se guadagna assee per fas ciar... e se gh'ha la tranquillitaa de la coscienza. L'è vera o no?

TOGN Pur tropp l'è vera quell che la dis... e magari avess semper faa insci che adess me trovaria minga in st'impiaister chi!

ANG. Perchè? cossa gh'è de nouv?... Che di spiasè el gh'ha sur Togn?

TOGN Se la savess!

ANG. Ma ch'el disa?... ch'el se spiega?... Cont mi el poo di tutt coss istess, perchè quasi poss di de vess soa tosa. L'è minga vera forsi?

TOGN (Euh, chissà, povera Angiolina, quand l'è che podaroo ciamalla cont quell nom li!

ANG. Ma perchè? ma come?

TOGN Che la sappia che mi, che nun, semm tucc su ona strada senza savè dove andarem a fenì... Che chi in sta cà de la disgrazia, oltre la miseria gh'è el disonor.

ANG. El disonor, el dis... ma in che manera?

TOGN La mia tosa...

ANG. La Savina... Ah! el sà anca lù...

TOGN L'è vera donca che sta sfacciada... Ma la vegnarà a cà... Oh la vegnarà... (*con minaccia*)

ANG. Ma sur Togn ch'el creda minga che lee...

TOGN Vuj savè nient... ghe n'hoo già assee de quell che soo, l'è finna tropp!... Ecco la bella posizion d'on pover pader de famiglia! La miseria e el disonor!... La gh'ha reson però la giustizia de quell lassù de castigamm a sta maniera chi... L'hoo voruu mi... e adess bisogna subi i consequenz di disordin...

ANG. Ch'el senta sur Togn, bisogna pœu minga disperass a quella manera li... Bisogna cercà i rimedi per medegà el mal... Ch'el se volta indree e ch'el guarda quanti disgrazi on poo pussee gròss de questa se ved e senza podègh rimedià... Ch'el sia on omm per bacco... Andemm sur Togn on poo de coragg! on poo de quell tal proposit e de quella vo-

lontaa che nun quand vœurem sem bon de mettegh, e pœu el vedarà!

TOGN Ma in che maniera rimedià... sentimm...

ANG. Ch'el senta, per el fitt... me par che sò fiœu el Gaitan el gh'abbia già pensaa...

TOGN L'è impossibil...

ANG. Eppur, me l'ha ditt a mi...

TOGN Ma mi ghe disi che l'è impossibil, perchè mi qui taj 60 franch che lù pover fiœu el m'avea daa per pagà el fitt... han faa la fin di alter.

ANG. No, no, disi minga de quij là...

TOGN Alora l'ha faa di debet?

ANG. Ma no... l'era on cunt vecc ch'el gh'aveva de scœud... jer i ha ciappaa... e incœu el va a pagaj...

TOGN Davvera? hin propi danee giust?

ANG. Oh! per in quant a quell podi giuraghel!

TOGN Paziienza!... Vedi ch'el mè sant el m'ha minga abandonaa del tutt... Pover fiœu... l'è ona perla quell Gaitan...

ANG. E me le dis a mi? Ma s'el fuss minga staa on bravo giovin, el cred lù che mi me sariss innamorada?

TOGN L'è vera!... (*sentendo rumore*) Chi l'è che gh'è chi?

SCENA VIII.

Gaitan, Luisa e detti.

GAI. Oh! l'è chi pà?... Vegni via adess del sur Batista...

TOGN (*volgendosi*) El sur Batista?

GAI. Sì, son staa a pagà el fitt... Ch'el tœuja, questa l'è la ricevuda... (*dandogli una carta*)

TOGN Tègnela pur... quella carta li l'è tutta to merit... per mi sta volta ghe entri propi nagott...

GAI. Fa nient, diavol, nun fiœu semm forsi minga obligaa a jutà i nost gent?

TOGN Sì, ma finna a on certo punt... Adess l'è fenida! Cominciand de doman, per quatter di filaa gh'hoo duu San Michee de fà, dove me tiraroo fœura una settantenna de franch. Guarda, Luisa, te prometti de datti tucc tal e qual i ciappi. Te see contenta?

LUI. Figuret, cara ti... ma però gh'abbia ri-guard... copet minga del lavorà... bisogna minga fà on poo tropp è on poo nagott del tutt... Oh! sentii, magari mi andaroo a tœu quaj cossa perchè a momenti vegnarà a cà la Savina, che incœu la gh'ha on lavorà de premura de fà in cà...

TOGN La Savina?

LUI. Sì, perchè?

TOGN Nient... nient... (*cupo*)

LUI. Alora voo neh?

TOGN Sì, sì, va pur... (*Luisa via*)

ANG. Ch'el vaga a lavorà sur Togn ch'el sarà mej... (*inquieta*) (Mi gh'hoo adoss ona paura che soo minga spiegà.)

TOGN No, no... œuh! gh'è temp... (*siede zufolando*)

ANG. (*piano a Gaitan*) Sent Gaitan, sta chi fin che ven la Savina... mi gh'hoo paura!

GAI. (No, no, sta quietta.) Oh! te la chi...

SCENA IX.

Savina e detti, indi Luisa.

- SAV. Oh, s'hii chl tucc?
- TOGN (*di soprassalto*) Ah! si... te see chi... brutta sabetta... Via de chi, via... (*le si avvicina minaccioso*)
- ANG. (*parandola*) Citto... ch'el vosa no...
- SAV. Ma cossa heo faa de mal?
- TOGN Ah, te gh'ee el coragg de di cossa t'ee faa? sfacciada! (*levandosi i denari*) Coss'hin sti danee chi, eh?... Perchè el to moros el paga el fitt per nun de nascondon?... eh! Te ghe n'ee minga assee de vedè la miseria? te vœuret anca el disonor?... Va via...
- SAV. Ma mi sont inocenta... mi soo nagotta...
- TOGN Ah! te see nagotta?... impostora... bo-sarda... Va via, te disi... mi te vuj pu vedè in cà mia... va a fatt mantegni del to moros... va... (*forsennato*) T'ee capii?... se de no... (*fa per avventarsele addosso*)
- GAI. (*fermandolo*) Pazienza, pà!... andemm, resonemm per Dio!
- TOGN (*furibondo*) Ah! resonà?... Sì, resoni finna tropp! (*fuori di sé*) Va via, mi... va via... mi te male... (*Gaitan gli chiude la bocca*)
- LUI. (*entrando sentendo le ultime parole*) Ah!... (*cade sulla sedia*)
- SAV. (*sviene fra le braccia di Angiolina*)

FINE DELL'ATTO TERZO.

ATTO QUARTO

Scena dell'Atto Terzo.

SCENA PRIMA.

Luisa lavorando, Teresa con un secchiello, indi Savina.

- LUI. Sont contenta che l'afari del fitt l'è giustaa.
- TER. Che bella robba! ma dimm on poo come l'ha fada pœu to mari cont i danee del sur Ernest?
- LUI. Ahn, gh'è success on pien. Figuret ti. L'altre el mè Togn el vegneva a cà stracch del lavorà che l'aveva faa del di per on San Michee, quand su la scala el tœuva el sur Ernest che l'andava via. Li le ferma, el ghe dis giò tutt l'afari, se scalden tutt e duu, vosen, sbragièn, finna che l'Angiolina per fortuna l'è saltada fœura, la persuaduu mè mari a vegni de sora, e el sur Ernest a andà per la soa strada.
- TER. Che peccaa che mi s'era minga a cà.
- LUI. Cossa t'avarisset voruu fà ti?
- TER. Chi, mi? Te vedevet... Col manegh de la scova, capisset, i robb se giusten pussee in pressa che a sta lì a ragionalla.
- SAV. (*entrando*) Te set in dove l'è el Gaitan, ti mamma?
- LUI. L'ha de vess andaa a portà via on para de brochen.

TER. Sura Savinetta, la sta ben?

SAV. Si, si... (*un po' stizzita*)

TER. Comè?... comè?... Che maniera?

SAV. Perché la dis insci?

TER. On' altra adess... La me saluda in d'ona certa maniera che squas squas diria che l'è in collera con mi.

SAV. Difatti per el bell servizi che l'ha m'ha faa, gh'avaria anca on poo de reson de aveghela su con lee...

TER. Come sariss a di? che la se spiega.

SAV. Ma si, se lee l' avess minga spampanaa per tutta la Corsia che mi gh' aveva quaj coss apenna apenna con quell gioven li, me pader l'avariss minga trataa con mi a la maniera che l'ha faa...

TER. Gh'hoo forse ditt on quaj cossa mi a sò pader?

SAV. L'era minga necessari quell, perchè lee l'aveva già faa sceula de per tutt.

TER. Ma cossa la cred chè sia, ona sabetta mi?

SAV. Quasi, quasi...

TER. Te vedet, Luisa, come tratten in giornada sti strusinn chi?

SAV. Ei, che la guarda come la parla, perchè emm mai bevuu el brœud de sciscer insemma mi e lee!

LUI. Neh, Savina, abbia riguard!

SAV. Ma che riguard che tegna! Ghe n' ha avun lee de riguard con mi, che a sentilla lee s'era la pesc tosa de Porta Cines?

TER. On'altra adess. Coss' hoo ditt infin? Di

veritaa bej e bonn. L'è minga vera che la fà la temola con quell vioron che sta chi sott?

SAV. La preghi sura Teresa a tegni on poo pussee la lengua in di dent.

TER. Larai!

SAV. E a scherzamm minga tant, capissela, se de no...

TER. Cossa? Sentimm on poo?

SAV. Ghe disi de finilla, perchè saront bonna de cascialla fœura de cà mia...

TER. Lee?... povera nercina! Ah, ah...

SAV. Sabetta villana!

TER. Ah, ah! pover sperluscin!

SCENA II.

Angiolina, e dette.

ANG. Cossa l'è sto mercaa?

TER. Nagotta, nagotta... hin tutt cinad de sta tosetta chi!

ANG. Ma insomma, se pò savè?

TER. Che la se figura lee che mi quand hoo savuu, e hoo vist cont sti duu gris chi (*indicando gli occhi*) che lee la ghe fava de bell a l'impiegaa, no ghe l'hoo ditt alter che chi a la sura Angiolina... a l'ortolana chi de bass... Ah! gh'hoo ditt quaj cossa anca a la Togna la pesserà... e...

SAV. E che la scusa s'hin pocch... Oh! per inquant a quell, la m'ha faa on bell servizzi.

ANG. Ma insomma, mi hoo mo de savè cossa l'è sta quistion.

SAV. La quistion l'è che lee siccome l'ha spampanaa sul mè cunt quell che l'ha voruu, l'è stada l'occasion che è success quell che è success, perchè già mè pader se l'è minga insognada lu sta storia...

ANG. A pian, Savina... el Gaitan el m'ha ditt che to pader l'ha savuu dal sur Batista, el refitù...

SAV. E probabilment el refitù l'avarà savuu de chi lee.

TER. Chi, mi? Ghe parli mai mi a quell impiaster li... Insomma quell ch' hoo vist mi l'avarà veduu anca lu...

SAV. Ma cossa la cred? che mi fuss insci sfa-ciada de dà in l'œuce de tutti?

LUI. Insomma sentii, adess quell ch'è staa è staa.

SAV. Sì, brava, la bell fà lee, ma mi...

ANG. Povera tosa, va là cascet minga... (*piano a Savina*) (Gh' hoo mandaa on bigliett al sur Ernest perchè el vegniss de mi.... Ti pensegh minga, lassa fa de mi.)

SAV. (Comè, te vorarisset?...)

ANG. (Ti lassa fa de mi.)

TER. Allora quand l'è insci ve saludi.... Ciao Luisa....

LUI. Voj, lasset vedè pœu, neh?

TER. Sì, sì.... La ven o la se ferma lee sura Angiolina?

ANG. Vegni anca mi. El Gaitan el gh'è minga istess, sicchè....

TER. Reverissi, neh! sura Savina.

SAV. Stia ben. Ciao, neh, Angiolœu. (*escono*)

LUI. Addio, neh!

SAV. Sont contenta d'aveghi ditt a la sura Teresa.

LUI. Sì, ma sta minga ben però.

SAV. Comè? ma la sa minga che dann l'è quell de fa andà la foresetta? La sa minga che consequenz se pò portà in d'ona cà? E pœu l'ha veduu anca lee.... L'è tant vera che me pader el m'ha mo nanca de perdonà.

LUI. L'è nient, vèh! L'è insci on poo de muson.

SAV. No, no, l'è rabbia bella e bonna. Per quanto men faghen però ghe sarà mai nisun che podarà casciamm fœura de la ment el sur Ernest. Mi de rimors de coscienza ghe n' hoo minga.

LUI. Chi l'è che te dis quaj cossa?

SAV. Sì, mi hoo semper tratta ben: lavori comè on danaa tutt el dì, e de fastidi de quij che s'intend me pader ghe n' hoo no.

LUI. Ben, va minga in furia, che finirà tutt coss polid.... Ti adess te stee in cà?

SAV. Com' hoo de fà a andà via, che gh' hoo li quell capellin lì de feni de premura?

LUI. Allora andaroo a tœu quaj cossa per el disnà. (*prende una scorbina*)

SAV. Va ben. E mi andaroo inanz a lavorà. (*siede al lavoro*)

LUI. Guarda che voo, neh! (*esce*)

SAV. Sì.... Ecco cossa vœuren di i apparenz! veden ona tosa insemma a on gioven, e li alon a drittura adoss che l'è istess.... lee l'è la soa morosa, lee la fà del maa, lee la disonora la cà.... e se podessen schi-

scialla farien anca quell. Pover tosann, quanti volt la gent la ve dà la cros adoss.... Basta, pensemegh no che l'è mej. *(canta)*
« Guarda i nostri bersaglieri, Col capell in su l'oregia.... Paren quij de.... »

SCENA III.

Togn e detta.

TOGN *(che l'ha sentita a cantare)* (Ma comè? la gha la faccia de cantà?)

SAV. Pover tosann a pensalla se diria finna di sproposit! *(seguita a lavorare)*

TOGN *(entrando)* Gh'è semper mai nissun in sta cà....

SAV. (Oh Dio! gh'è chi el pà.)

TOGN *(aprendo la credenza)* Gh'è nient nanca de mangià.... *(aprendo il cassetto del tavolo)*

Odess! han vanzaa nanca on crostin de pan.... (Se fuss minga in collera cont quella lì, ghe diria de andaa a tœu ona misturina cont duu sold de quaj coss.)

SAV. Malarbetta la guggia! Paren faa de pasta.... tutt i moment s'en romp ona quaj vœunna....

TOGN (Al fà che l'ha gh'ha, se diria o che l'è ben sfacciada, o che la sa nagotta come el me diseva mè fiœu; l'è inutil, bisogna che ghe parla mi per el primm.) La Luisa la gh'è no?

SAV. No, l'è andata a proved....

TOGN Ah! va ben, perchè a di la veritaa ghe l'hoo on poo sotto....

SAV. S'el vœur quaj cossa, voo ben a tœughel mi.... *(fa per alzarsi deponendo il lavoro)*

TOGN No, no, fà nagotta.... specciaroo...

SAV. Che cialad.... *(si alza e fa per andar via)*

TOGN T'ee capii che vuj no? Va inanz a lavorà ti, che te gh'avaree pressa.

SAV. (Come l'è dolz inœeu el pà!) *(siede ancora)*

TOGN Per chi l'è quell capellin lì?

SAV. L'è per la tosa del dottor Cornetta.

TOGN L'è bell!... El starà ben....

SAV. Œuh! chissà che suss! *(Togn ride.... pausa.... poi si alza, e si avvicina al padre)*
 Neh! pà....

TOGN Cossè?

SAV. L'è in collera anca mo cont mi?

TOGN Ma....

SAV. Ch'el senta, posto ch'el vedi dispost a scoltamm.... vuj digh tutt.... vuj ch'el se persuada che mi gh'hoo la colpa de tutt i tosann che gh'ha on cœur sensibil.... sì, l'è vera.... hoo vist sto sur Ernest insci attent, insci premuros per mi che gh'hoo voruu ben.... lu el me vegneva adree in strada.... el me compagnava a cà, finna che ona sira....

TON Che sira?

SAV. Ma sì, la sira prima de quell di che lu....

TOGN Citto,.... discoremèn pù.... sicchè....

SAV. In quella sira là el sur Ernest el m'ha fermaa sui scal... el m'ha parlaa... insomma el m'ha ditt che l'era inamoraa de mi... e ch'el voreva sposamm.

TOGN Sposatt!... ti?... ona madamin?

SAV. Cossa ghe entra quell? Ghe l'emmm forse minga anca nun el cœur?... L'amor, vedel, el guarda in faccia a nissun...

TOGN Quell l'è vera, ma sposatt pœu...

SAV. El cred minga forse?

TOGN Sì, el sarà benissim, ma...

SAV. Comè? me l'ha ditt lu vedel! me la giurraa...

TOGN Sì, sì, hin tutt de qui giurament che de solit tegnen no. Te see minga cossa ghe n'è che giura per l'anima di sò boton?

SAV. No, no, l'è minga possibil... el mè Ernest el diseva daverà!

TOGN Vedaremm.

SAV. Neh! pà, el me perdonna vera lu... me le disarà pu quella brutta parola là, vera?

TOGN Figuret la mia tosascia... s'hoo minga de perdonatt! L'è mi che m'aveven miss on trav in d'on œucc!

SAV. Ch'el ghe creda pu ai ciacer de la gent.

TOGN No, no, sta pur quietta... Guarda, Savina, te par minga che sia cambiaa mi?

SAV. Òuh! e come... ma come l'ha faa?

TOGN Com'hoo faa... Hin staa dò paroll che m'ha tiraa su la strada giusta... la miseria e el disonor... Hin dò paroll veh quij lì, che per on omm de cœur, anca ben ch'el sia gajnnatt, ghe fan colp. Chi bisogna fenilla! Chi bisogna lavoraa e fa ona vita diversa, e adess veh!... adess che ti te me casciaa via del tutt quell'ombra de dubbi

che m'era restaa... adess sont content... adess sont pusse scior mi del Duca Litta... perchè de fastidi ghe n'hoo pu... adess tiri el fiaa longh, liber... senti pu quell'intopp chi al canaruzz che me strozzava... adess sont on omm tranquill, e content del mè stat.

SAV. (*abbracciandolo*) Oh pà, come me pias a sentill a parlà insci!

TOGN Povera Savina! (*l'abbraccia*)

SCENA IV.

Peder e detti.

PED. Che bell quadrett!

TOGN Te see ti?... E insci, come l'è andata sta matinna?

PED. Minga malott... Hoo faa do e vinticinqu nett... Te par, o no?

TOGN Diavol! Te pias minga pussee adess che prima quand te favet nient tutt el dì?

PED. Òuh! sen parla nancat... adess la va coi flocch... E de quij alter duu che gh'è al secur, se sa nagotta?

TOGN Hin staa esaminaa, e per quell che disen el par ch'abbien de andà a la Cort di Scisger.

PED. Ah si?... Te saludi allora!

SAV. De chi l'è che parlee?

PED. Hin quij duu bei mobil che sta chi in del Streccion, el Bisc e el Tanella...

SAV. Ah, vedi!... t'ee fa puranc ben veh, ti a liberatt de quij duu lì.

PED. Per diana s'hoo faa ben! me n'accorgi

adess... Voj pà, te see che vuj andà anca mi in la Societaa del mutuo?

TOGN Ah! si? Bravo!... Quella l'è stada ona gran bella robba. Se no alter quand s'è malaa se gh'ha el sò franch al di, e pœu quand s'è vecc, bon pu de lavorà, gh'è la soa pension... e pœu figureves che finna quand se tira i calzett pensen lor al funeral, a tutt coss... L'è stada ona gran bella provvidenza per nun poveritt! Ma voj, regordes ben de filà drizz veh!... perchè in la Società scherzen minga; e fan ben.

PED. Diavol, cossa te me credet? Semm o no semm?

SAV. Anca mi apenna sont in cas vuj andà in la Societaa di operari che gh'è li in Rugabella.

TOGN Evviva... hoo bell'e vist; de chi a on poo d'ann emm de feni a viv d'entrada nun. Ah! ah!

SAV. Comè, el rid, lu pà?

TOGN No, no, foo insci per smorbià on poo. Figureves se vuj ciappà in rid quij robb li... hin afari tropp seri...

SCENA V.

Luisa colla sportina, Ignazi e detti.

LUI. Oh, che brava gent! s'hii chi tucc?

TOGN L'è squas ora de disnà, sicchè... Voj ti Gnazi, cossa t'ee faa incoe a scœula?

IGN. Hoo studiaa tutt el di.

TOGN Chi sà cossa t'ee faa ti...

IGN. Hoo ditt la lezion... ho scritto sulla ta-

vola... e pœu emm faa el compito sotto dettatura...

TOGN Sì, ma cossa te fan studià?
IGN. La Storia, la Geografia, la Ginnastica... l'Aritmetica...

TOGN Va benon tutt sti robb... mi però vedi mai nagotta de tutt sti afari chl.

IGN. Se veden minga veh!... s'imparen, e nun i semm...

TOGN En soo pussee mi che sont minga bon de scriv, che vialter...

IGN. Ghe scometti che ti sulla carta te set nanca dove l'è Milan!

TOGN Ah, hoo minga de savell, eh?... Milan l'è chi!... dove sem nun forsi?

IGN. No, no, l'è minga insci!... Milano, capitale della Lombardia, posta sul fiume Olona...

TOGN Fium! te ghe diset fium ti? Ma va on poo via! Ona ronsgia che in duu pass la se traversa!... Digh al to maester ch'el te insegna domà di ball.

IGN. L'è minga vera! (*stizzito*)

LUI. Insomma fenilla on poo... diavol... t'ee de sta li a tœulla cont on bagaj?

SAV. Ven chi, ven chi, pover Gnazi, te ghe reson! El pà el fà insci per rid...

PED. Ma sì, diavol, te vedet no ch'el rid?

IGN. L'è vera, l'è vera...

SCENA ULTIMA.

Gaitan, Angiolina, Ernest indi Teresa e detti.

ANG. Se pò, bonna gent?

TOGN Oh, reverissi! (El sur Ernest.)

SAV. (Oh, Dio! el mè spos!)

TOGN Ma... l'è insemma cont vialter quell scior là?

GAI. Già...

ANG. Sì, l'è insemma a nun, perchè el gh'ha ona domanda de fagh...

TOGN A mi?

ERN. Sì, ... a lu...

SAV. (Cossa el sarà? mi tremi tutta!)

TOGN Ch'el disa pur...

ERN. Lu el savarà benissim la mia relazion cont la soa tosa...

TOGN Sì, sì, soo tutt coss...

SAV. Ghe l'hoo ditt mi.

TOGN Citto, ti...

ERN. Allora, quand l'è insci, ghe domandi de podè sposà la soa tosa...

TOGN. Ma... comè... e lu el vœur?

ERN. Ecco: questa l'è la risposta de mè zio, dove el me dis de fà pur la mia volontaa, e sicome mi ghe vuj ben alla soa tosa, al punto che podaria minga vess content senza de lee, insci mi adess sont chi a pregalla de vorè vess mia miee...

IGN. Comè? comè?

TOGN Rispondegh donca ti, Savina...

SAV. Ma tocca lu che l'è mè pà...

TOGN Ma no, hoo minga de sposall mi...

SAV. No, ma ch'el ghe disa se l'è content, almen...

ERN. Andemm, sur Togn, ch' el me disa ona bonna parolla?

TOGN Sì, sì, là... che le sposa pur!

IGN. Oh, cara, che gust! sta volta foo ona spansciada de benis!

LUI. (a Togn) Adess pœu ti ringrazia l'Angiolina di danee del fitt...

TOGN Ma che fitt? che danee... L'ha minga pagaa el Gaitan?

LUI. Sì, ma la doprà i danee che g'ha imprestaa la soa Angiolina...

TOGN Ma e ti... t'ee... (a Gaitan)

ANG. Citto... son stada mi che l'ha sforzaa... sta volta hoo voruu comandà on poo anca mi... Diavol... cossa sont mi? Sont minga quanto prima la miee de sò fiœu?...

TOGN Insomma ve s'hii tra insemma tucc per fa del ben... Sia fada la vostra volontaa... Mi soo pu cossa di per ringraziav!

IGN. Eviva i spos!

TER. (entrando) Ah! sì? Dov' hin sti spos? (vedendo Ernesto e Savina vicini) Comè? l'è lu che...

GAI. Sigura.... cossa ne dis?

TER. Ma bene, per bio... Che diavol d'on sperluscin! Sont propi contenta de cœur come se la fuss ona mia tosa.

SAV. Grazie, sura Teresa; lee l'è tropp bonna.

TER. Minga tropp però...

SAV. No, no, quij là hin cialad, tutt ciacer e nient de pu...

TER. No, no, la gh'aveva reson. Pensandegh ben hoo vist anca mi che a fa andà tropp sta scia vatta chi (indicando la lingua) se pò portà di pregiudizi minga de pocch... Ma...

hoo bell' e fissaa... tutti i volt che faroo
per parlà me schisciaroo la lengua sott' i dent.

ANG. Che la faga minga quell sproposit li.

GAI. Angiolina?

ANG. Cossa gh'è?

GAI. E nun quand l'è che femm spos?

ANG. Quand te vœu ti? Però te ghe ciamaa
el permess a tò pader?

TOGN Ma che permess d'Egitt? soo ben che
la fà per rid....

ANG. Sicchè alora....

TOGN Ma si, sposeves pur che sont conten-
tissim.

LUI. Bravi fioeu, adess, ciao, cala domà el Peder.

PED. No, no; mi gh'è temp anmò.... prima vuj
fà su on poo de ghej.

TOGN Insomma i ciacer van ben, ma mi gh'hoo
fam....

ERN. Se me pernetten, incœu i invidi a man-
giaa on bocon a la Nos....

TOGN Mi accetti de cœur, e prœuva ne sia
che me vestissi subet de la festa.... Corpo
d'ona pipa! l'è del gran temp che prœuvi
minga ona consolazion come quella d'in-
cœu!.... Basta.... adess l'è fornida.... quand
gh'è salut, banna volontaa de lavorà, e crappa
giusta, de miseria ghe n'è pu, perchè hin
assee sti trè robb chi per fa diventà on omm
scior e content, mej che ogni ricchezza de
stoo mond.

FINE DELLA COMMEDIA.